

古文尚書鄭氏注箋釋

古文尚書鄭氏注箋釋卷四十

曹元弼學

書序第三十五

下此題今增鄭原本或亦如是

周書

惟十有一年武王伐殷

十有一年本文王受命而數之是年入戊午節四

十歲矣

詩文王疏

箋云

漢書說書序曰惟十有一年武

王伐紂大誓八百諸侯會

詩唐

史遷說武王即位

九年東觀兵至于盟津

一月戊午師渡孟津作泰誓三篇

箋注漢書又說還師二年乃遂伐紂克殷十三年也序曰一月戊午師度孟津史遷說武王還師歸居二年聞紂昏亂暴虐滋甚于是徧告諸侯遂東伐紂十一年十二月戊午師畢渡盟津乃作太誓告于衆庶釋曰此周書首篇之序故以惟字發端十有一年者據一月戊午師渡孟津誓師時追敘之言自十一年武王始伐殷至孟津之上未渡而還閏二年至此一月戊午始率師渡孟津誓衆以卒伐暴救民之事史因其誓述其始末作太誓三篇上篇言十一年觀兵之事中下二篇言十三年

一月誓師克商之事。與盤庚三篇體例同。一月為歲首。凡書歲首之月者。皆別於上年而言。如堯典正月上日。別於上文。乃言底可績。三載月正元日。別於上文。百姓如喪妣。三載。此書一月。正與同例。其不蒙十有一年可知。古史簡質。若係一年事。則但書惟十有一年。武王伐殷。師渡孟津。作太誓足矣。今特出一月戊午之文。明以別於上文十一年也。古書序例無年月。惟伊訓太誓兩篇有之。伊訓序云。成湯既殁。太甲元年。伊尹作伊訓。據太甲元年上溯成湯之殁。則其間外丙仲壬二世足以包

見之太誓序云十有一年。下又云一月戊午。則其
間還歸二年亦足以包見之。故特出變例。書年月
以見義。若讀之不審。以一月戊午屬十一年。不將
以太甲元年。為湯崩後明年。而廢闕外丙仲壬二
世乎。鄭君分別觀為十一年事。師渡孟津為十三
年事。實深悉古史文法。故與逸周書國語禮記乾
鑿度諸文。一一符合也。知十一年本文王受命數
之者。受命謂受天命。康誥曰。天乃大命文王。天視
自我民視。天聽自我民聽。虞尚質成。諸侯皆曰。西
伯蓋受命之君。故武王觀兵。追本文王之年。以此

年為受命元年。自此至崩凡七年。大傳史記每年
具詳其事。武王即位。依常例明年改元。三年喪畢。
至四年周正四月。因紂惡益稔。庶民弗忍。東觀兵
以害誅天命人心。欲以救民水火之功。歸美文王。
故追本文王受命之年。稱十一年。猶禮文王三分
服事之心。未忍即伐。還歸二年。紂殺比干囚箕子。
微子亦不得已而去。天怒人怨已極。至武王即位
六年。於文王受命為十三年。乃復舉兵渡孟津而
北。遂伐殷誅紂。鄭以十一年為戊午。部四十歲者。
鄭據歷以推校文武間年數。使一一符合。江氏發

明甚詳。孫氏引以入疏。余已於孫疏校補正其誤字。茲從略。王氏說文王受命七年而崩。武王承其年數。十一年觀兵。以卜諸侯之心。十三年復伐紂滅之。當時實事本是如此。今文太誓敘述觀兵之事。鄭於彼文下注云。天意若曰。須假紂五年。方可誅之。多方云。天惟五年須暇之子孫。鄭注云。天觀紂能改。故待暇其終至五年。欲使復傳子孫。五年者。文王受命八年。至十三年。是須暇五年之事。據此則武王以十三年滅紂。又鄭于金縢篇末注云。文王十五生武王。見大九十七而終。終時武王八

十三矣。于文王受命為七年。後六年伐紂。後二年有疾。疾瘳。後二年崩。崩時九十三矣。據此則十三年滅紂。益信。此序上半截十一年伐殷。指觀兵事。非滅紂事。下半截一月。指十三年一月。非十一年一月。故鄭以十有一年為本文王受命數之也。偽傳說序與鄭大同。惟云文王受命九年而崩。蓋據逸周書文王受命九年之文。不知此謂受為西伯之命。非受天命。又謂武王大祥觀兵。蓋據漢書律歷志。文王受命九年。而再期在大祥。而伐紂一條。然武王方從容以須之。何必大祥即興師也。大約

紂伐之年。史記周本紀與漢書律歷志二者各有一誤。史記文王七年崩是矣。而九年觀兵十一年殺紂則非。漢志十一年觀兵十三年殺紂是矣。而文王受命九年崩則非。何也。羣書記伐紂之月皆周正。十三年二月初五日殺紂。建丑月也。而其發師則在十月。建亥月二十八日。若十一年二月初五殺紂。則發師已在十年十二月二十八日矣。文王不知何月崩。就令正月崩而自七年數至十年十二月。九年數至十二年十二月。只四年。無五年。德與須臾五年不合。故必依鄭受命七年崩。十一

年觀兵十三年滅紂方確也。案王說甚精核。逸周書惟王元祀。此武王即位改元也。其下有二祀三祀而無四祀。蓋武王四年觀兵。當以受命十一年布告諸侯。不得稱四祀。故大誓序曰惟十有一年武王伐殷。至克紂時則為十三年。故洪範序稱武王勝殷以箕子歸。而經云惟十有三祀。逸周書三祀下直接十有三祀十有二祀。武王之年。一祀二祀三祀見於逸周書。十一年見於書序。中有二祀見於逸書。十有三祀見於洪範逸書。自四年至十年。經傳絕無文。蓋四年即受命十一年。當時天下

皆稱十二年。不稱四年。此合校經傳可推見者。文王十五生武王。文王之崩。武王八十五矣。若不越十一年而伐殷。克殷後又數年而崩。則與禮記九十三而終之數不符。以此知武王追稱文王之年。決非虛語。蓋武王即位。依諸侯繼世常禮。踰年改元。至觀兵之役。奉文王木主以東伐。始追本虞芮質成之年。數之。今古文說觀兵九年十一年。克紂十一年十三年。雖異。然自受命七年數至十一年。五年稍濫。或自八年數至十二年。五年稍贏。皆得五年。故多方曰。天惟五年。須臾之子孫。此周公之

言確然無疑。觀禮記引大誓稱惟朕文考無罪。非朕文考有罪。墨子引大誓文王若日若月則應天順人歸功於親可知。伯夷叔齊誅武王父死不葬可謂孝乎。此史記列傳引舊傳之言必出自周人記載。如伯夷言則奉木主以伐去文王崩未遠又可知。故淮南子有武王大祥觀兵之說。錢氏塘謂三統歷始誤以武王即位改元為文王受命改元。不知三統歷之誤在不言武王改元。不識受命之年出於觀兵時進本不在以武王之年為文王之年。若書序十一年係武王即位後實年則多方之

文不可通淮南子史記豈盡妄言乎。且考古者當
斷之以義。文王改元稱王於義不可也。武王追尊
紀元於義無不可也。在文王為忠。在武王為孝。羣
言淆亂。亦折諸忠孝而已矣。以上因余舊所為文
王改元稱王辨而略更定之。須暇五年。要以鄭說
為再確。伐紂之年必去文王喪終不遠。然云大祥
觀兵為不服三年之始。則殊非。曾子問篇。子夏問
三年之喪。卒哭。金革之事無辟。禮與。孔子曰。昔者
魯公伯禽有為為之也。今以三年之喪從其利者。
吾弗知也。若使武王先以大祥觀兵。則孔子何不

引之。而稱復之伯禽乎。不待喪終而觀兵於須臾之義。得毋悖。而謂文王為之乎。總之。文王得洛書之命。在入戊午部二十九歲。見易緯。戊午部者。曆法二十部為一紀。七十六歲為一部。以每部之首一日干支名其部。此部首日直戊午。故名戊午部。入此部二十九歲。又歲戊午。其明年己未。虞尚質成。後以為受命元年。越七年。文王崩。歲在乙丑。明年丙寅。武王即位。改元。四年己巳。改稱文王受命十一年。觀兵。為入戊午部四十歲。又明年庚午。又明年辛未。為受命十三年。伐紂。故國語稱武王伐

紂歲在鶉火。此歲為歲星。鶉火午也。歲星在午則太歲在未。國語下文。歷說日月星辰所在。以漢志鄭注推較。無一不合。詳江孫說。其餘各家傳聞異辭。兼存以備多識可也。

經予克紂。非予武。惟朕文考無罪。紂克予。非朕文考有罪。惟予小子無良。禮記

箋云鄭氏說。克。勝也。非予武。非我武功。考。文考。文王也。無罪。言有德也。無良。無功善也。此武王誓眾以伐紂之辭也。今太誓無此章。則其篇亡。注**釋**

曰此善則歸親。過則歸己之義。干氏易注云。武王

以文王行。明己之受命。文王之德也。武謂除暴禁
亂之功。傳所謂武有七德。非尚力也。以至仁伐至
不仁。明知其必克。而猶云爾者。聖人德大而心小。
臨事而懼也。此條禮記。

民之所欲。天必從之。

左氏襄三十一年昭元年
傳國語周語鄭語並引

釋曰

中庸曰。天之生物。必因其材而篤焉。善者天

厚其福。惡者天厚其毒。紂自絕于天。故天棄之。欲

亡而得亡也。

紂有億兆夷人。亦有離德。余有亂十人。同心同德。

左氏

昭二十四年傳引 又成二年傳稱商兆民離周
十人同約此文管子法禁篇引小異亂十人作臣

三千或別
是一條

釋四 億兆夷人。謂中國億兆之衆。兼及四夷。尺地
莫非其有。一民莫非其臣。然而滅亡者。失其心也。
人人異心。則無一人之用。所謂獨夫。為人上者可
不敬乎。

朕夢協朕卜。襲于休祥。戎商必克。國語

箋云 韋氏說。朕。武王自謂也。協。亦合也。休。美。祥。福。

之先見者也。言武王夢與卜合。又合美善之祥。以

兵伐殷。當必克之。國語**釋四** 至誠之道。可以前知。

聖人德通神明。故夢卜休祥皆應。善後也不修德。

而好機祥則祥反為妖耳。故赤烏之瑞。周公曰恐恃之。而王動色變。以上三條。左傳國語。

文王若日若月。乍照光于四方。于西土。墨子兼下引

釋曰孫氏曰。乍。古與作通。案言文王之德。光被四

表。始自西土。

紂夷居。不肯事上帝鬼神。棄厥先神祇不祀。乃曰吾

有命。毋侮其務。天亦縱之。棄而弗葆。墨子非命中三引此

文字多異江氏刪合之使文從字順今從之其異文異載江孫疏

釋曰江氏云。夷居。倨慢也。僂讀為勑力之勑。言己

已有命。不畏鬼神。毋為勑力于鬼神之務。墨子曰。

此言紂執有命也。武王以太誓非之。案今之不孝不敬，逆天地，誣神明者，皆紂之徒。故其敢于為惡，與紂同。天亦必棄之，與紂同。

惡乎君子？天有顯德，其行甚章，為鑑不遠。在彼殷王，謂人有命，謂敬不可行，謂祭無益，謂暴無傷。上帝不常，九有以亡。上帝不順，祝降其喪。惟我有周，受之大

帝。墨子非命，下引其上有於去發曰：「四字去發二字不可解，以意推之。」蓋謂凱旋將去殷，發行時言也。

釋曰 王氏云：「大帝當作大商。」與上文為韻。案紂之

大商，謂天以殷之命授周，而周受之。猶酒誥云：「克受殷之命也。」此蓋太誓末篇語。既克紂而云然，以

垂萬世戒。詩所謂宜鑑于殷也。

小人見姦巧。乃聞不言也。發罪鈞。墨子尚

釋曰發發覺也。孫氏曰。此蓋言紂苛政也。即漢見

知之法。先王所無。以上四條墨子

我武維揚。侵于之疆。則取于殘。殷伐用張。于湯有光。

孟子滕文公篇引

箋云趙氏說。我武王用事之時。惟鷹揚也。侵紂之

疆界。則取于殘賊者。以張殷伐之功也。民有簞食

壺漿之歡。比于湯伐桀有光寵。美武王德優前代

也。**釋曰**此克紂後史臣美武王之辭。宜在篇末言

我武功惟顯揚。侵至商郊。即取其殘。言紂自斃也。
殺伐之功用。是張著。明除暴取殘。非敵百姓。於湯
救民之功。並有光。蓋言道同也。

天視自我民視。天聽自我民聽。

孟子萬章篇引

箋云趙氏說。自從也。天之視聽。從人所欲也。

釋曰

夫然故湯聞衆言。則畏上帝而不敢不正。庶民弗
忍。欣戴武王。則知上帝臨女。當無賣爾心也。召誥
曰。夫知保攜持厥婦子。以哀籲天。天亦哀于四方
民。其眷命用懋。故無道之甚。下民號而上訴。上帝
懷而降監。乃別敎命于聖王。天之愛民甚矣。豈忍

聽惡人肆于民上，以縱其淫，而不為之立父母哉。

以上兩條孟子。

獨夫紂荀子議
兵篇引

釋曰孟子曰：殘賊之人謂之一夫。聞誅一夫紂矣。

未聞弑君也。此條荀子。以上十一條皆依孫

氏錄之。孫本前有四條，後又有詩、蒸、民、莩，引一條。

皆漢世太誓所有，今入本篇。

武王戎車三百兩，虎賁三百人，與受戰于牧野，作牧誓。

牧野，紂南郊地名。

詩大
明疏

箋五

戎，兵也。

中庸

史遷說。

武王遂率戎車三百乘。虎賁三千人。甲士四萬五

千人。以東伐紂。漢官儀曰。書稱虎賁三百人。言其

猛如虎之奔赴也。後漢書順帝紀注受一作紂。牧。壁中古

文作毋。說文曰。毋。朝歌南七十里地也。从土。母聲。

周書曰。武王與紂戰于毋野。部土**釋曰**江氏云。賁。奔

音同字通。三百人。當為三千人。孟子曰。武王之伐

殷也。革車三百兩。虎賁三千人。司馬法曰。革車一

乘。士十人。徒二十人。樂記曰。虎賁之士。說劍。然則

虎賁士也。一乘十人。三百兩則三千人矣。周禮虎

賁氏。下大夫官。樂記言虎賁之士者。蓋周公制禮。

用二人為虎賁之官。爵為下大夫。屬之司馬。其次中士十有二人。當文武時則是守衛之士。非必大夫也。樂記所言。是武王伐紂時事。虎賁故是士也。又周禮虎賁氏之屬有虎士八百人。此虎賁得有三千人者。蓋周禮所說。據平時役使者。八百人是矣。若出軍。必更徵發士卒。此虎賁即士卒也。三千人不為多也。且此時未有周禮。不得據以為說。案江說是也。虎賁三千。蓋準出車一乘士十人之數。選尤饒勇者為之。平時以給守衛。出軍以為精兵。其下更有步卒。人數多寡。司馬法所說不同。蓋三

代異制。史記又有甲士四萬五千人。序不言者。蓋三千人如後世之親兵。傳謂之王卒。牧野之戰。師尚父以百夫致師。遂以大卒馳紂師。大卒蓋即虎賁。是時紂師即輻分瓦解。倒戈以開。武王四萬五千人。更無所事於戰。故序及孟子但言三千人。明以至仁伐至不仁。不待用衆也。管子稱周武王之臣三千而一心。蓋即指此虎賁三千人而言。毋正字。牧。同音假借字。說文稱周書者。古人引經傳或。不甚分別。如引說命序謂之商書也。

武王伐殷。往伐歸獸。識其政事。作武成。

著。武道至此而成。武成逸書。建武之際亡。疏
策云

史遷說。乃罷兵西歸行狩。記政事。釋曰獸狩字古

通。段氏孫氏引詩搏獸于敖。後漢書安帝紀注引

作薄狩。諸文證之甚確。惟歸獸。自偽孔以來皆以

樂記散馬華陽散牛桃林當之。皮氏說獸狩通用

可段狩為獸。亦可段獸為狩。此序所云。是巡狩之

狩。非禽獸之獸。古文書序云往伐歸獸。乃段獸為

狩字。史記云西歸行狩。正用巡狩本字。西歸行狩

即是歸狩。非史公段狩為獸也。所以知史公非段

狩為獸者。周本紀以縱馬放牛偃干戈振兵釋旅

之文置於營成周於洛邑之後。則史公所據今文。說不以歸馬放牛為罷兵西歸行狩時事。即不得以歸馬放牛之文當歸獸之文矣。古文書序作往伐歸獸。蓋謂往而伐殷歸而巡狩。其義與今文不異。史記用今文作西歸行狩。則文義尤明。解者誤以古文書序為用本字。則往伐歸近於不辭矣。又誤以史記用狩字為段借。試易其文為西歸行獸。尤不可通。良由不知古文是段借。今文是本義耳。武王行狩。古有明徵。周頌時邁序曰。巡狩告祭柴望也。左氏傳以為武王克商作頌。是時邁所云巡

狩塲是武王之事。即在作武成之時。樂記引孔子之言曰。武始而北出。再成滅商。序所謂往伐也。三成南^子四成而南^子。罔是疆。序所謂歸狩也。樂記亦有散馬牛之語。而在濟河而西之後。遠不相屬。作偽古文武成篇者。不知序獸字是段借。乃取史記樂記歸馬牛之文以當之。殊不知史記樂記上下之文。皆不以歸馬牛為此時事。其謬固不待言。江段諸君亦未得其義。案皮氏此說。獨勝諸儒。序云識其政事者。識記也。謂史臣記錄伐紂至巡狩前後所行政事。如樂記所云。蓋皆史所記之政。當備見

於此篇散馬牛即包在其中武功至是而成故名篇曰武成舊解以識政為記商之善政亦未確又或以歸狩為武王田狩據逸周書為說然彼文多誇張誕妄蓋晚周人所為事蹟虛實參半且字多脫誤不足據

經 惟一月壬辰旁死霸若翌日癸巳武王迺朝步自

周于征伐紂

漢書律歷志引武成篇

箋 五月三日始生兆肚名曰霸康誥死霸朝也生

霸望也漢書律歷志霸古魄字漢書**釋曰**江氏云

一月斗柄初昏建子之月殷之十二月在周為正

月也。不言正月者。時未改正朔。故但以數紀言。一月也。壬辰初二日也。旁死霸。月偏體皆暗也。月三日為哉生霸。故二日為旁死霸也。翌日。明日也。周錫京也。案說文。霸。月始生魄然也。承大月二日承小月三日霸魄一聲之轉。魄之言白。謂月始見兆眇。有微光魄然。經傳相承多借魄為霸。月三日或二日微明始見。是為哉生霸。自是明日盛。至十五日而明滿。霸盡生矣。故云生霸望也。十六日傍之。故云旁生霸。或云既生霸。其明日為既旁生霸。自是明日虧。至月晦而明盡。霸死矣。月有大小。小月末

日明猶有未盡。惟合朔之日。月之明全不見。故曰死霸朔也。二日旁之。故云旁死霸。至三日。朏則霸又始生矣。劉歆說與尚書禮記說文皆無違戾。後人因魄字本訓為陰神。乃以為月質無明之處。斯大誤矣。月質常在無增損。而光有盈闕。死霸生霸之名。可施於月光。不可施於月質也。

粵若來二月既死霸。粵五日甲子。咸劉商王紂。

同上

釋四

一月辛卯朔。月小己未晦。二月庚申朔。至甲

子凡五日。則既死霸當指朔日。朔為死霸。而云既者。晦日明盡。己是死霸。此從朔數至五日。故云既死

霸粵五日。猶云既朔粵五日。兼朔數之也。粵若來。
江氏云。若猶而也。粵若來者。于是而來也。案若亦
順也。言順是而來。中間歷日多。故云然。與召詰同
義。劉說文作銹。云殺也。孫氏云。威與戔通。說文。戔。
絕也。讀若威。案孫說甚通。愚又謂威皆也。猶共也。
荀子云。武王誅紂。鼓之而紂卒。易鄉。遂乘殷人而
誅紂。誅紂者。非周人。乘殷人也。故無首虐之獲。無
蹈難之賞。蓋殷人倒戈長驅。欲得紂甘心。紂乃自
焚。所謂威劉也。

惟四月既旁生霸。粵六日庚戌。武王燎于周廟。翌日

辛亥。祀于天位。粢五日乙卯。乃以庶國祀馘于周廟。

上同

釋曰 三統歷謂是歲二月後有閏月。二月庚申朔。

閏月庚寅朔。三月己未朔。四月己丑朔。江氏說。準

此己丑朔以推。則既旁生霸為十七日己巳。越六

日庚戌為二十二日矣。下推次可知。生霸望也。旁

生霸。十六日也。既旁生霸。十七日也。此武王歸周

祭天祭廟以俘馘告也。燎于周廟。祀于天位。祭祀

而已。與獻馘無涉。二十八日乙卯。乃以馘獻于廟而

再告祀。逸周書世俘解乃以燎于周廟為獻紂馘。

祀戰于周廟為獻庶職顯於經外妄增故實。且文義多不可解。殊不足信。愚昔為述學詩。註力辨武王斬紂懸首大白之誣。今錄其文於後。顧命鄭注云。赤刀。武王誅紂時刀。謂當時佩刀耳。非逸周書所謂輕呂用以擊紂之劍也。

經 血流浮杵。論衡語

釋曰 趙氏孟子章句浮作漂。經明云弗禦克奔。以殺奔降為大戒。商人既倒戈易鄉以開周師。武王豈有殺之之理。所謂血流浮杵者。蓋紂用多罪過。逃為大夫卿士。暴虐于百姓。姦究于商邑。百姓怨

之深入骨髓。此等醜類。實繁有徒。戰時必皆以為
 軍帥師帥旅帥之等。周師至。士卒以為今而後得
 反之。遂乘勢聚而殲旃。故致血流漂杵。此周師所
 不及禁也。史家敘紂師奔潰情形。略舉大端。古文
 簡質。不曲加分別。書家或失其解。戰國時侈言戰
 陳者。或藉口於此。故孟子辯之。非孟子駁經。亦非
 誤解經文。特以明武王之事。必不如當時藉口者
 之所云。盡信書則不如無書。猶說詩者不可以文
 害辭。以辭害志耳。吾於武成取二三策。蓋示人提
 要。鈞元舉大義之法。孟子所稱書曰天降下民云

云。綏厥士女云云。王曰無畏。宣爾云云。及大傳所稱周公之言。諸子所云武王入殷。朝成湯之廟。復盤庚之政。散鹿臺之財。登鉅橋之粟。歸傾宮之女等事。當皆在二三策中。此武成之大義也。得其大義。則其餘史文雖若有可疑。皆可推而得其意。故決之曰。仁人無敵於天下。以至仁伐至不仁。豈有鏖戰流血之事。則所謂血流浮杵者。謂紂卒輻分紂車瓦裂時。自相敵讎所致。或史家敘述軍威稍有溢辭耳。若泥其文而盡信之。勢必誤解其意。而為小人所藉口。則不如無書矣。賓牟賈論武樂聲。

淫及商。謂有司失其傳。孔子然之。更詳其義。孟子
之論書。猶孔子之論樂也。武王之事。於是明。武成
之意。於是得。而讀書之法。亦於此可豁然大通矣。
述學詩注錄後

逸周書克殷篇。武王以虎賁。戎車馳商師。商師大
崩。商辛奔內。登于鹿臺。自燔于火。武王入。適王所。
射之三發。而後下車。擊之以輕呂。斬之以黃鉞。折
縣諸大白。史記本此賈誼新書。紂將與武王戰。紂陳
其卒。鼓之不進。皆還其刃。顧以鄉紂。紂死。民之觀
者。皆進蹴之。蹈其腹。履其腎。踐其肺。履其肝。周武

王乃使人帷而守之。民觀之者，搗帷而入，提石之者，猶未肯止。案武王伐紂，迫於天命人心，但求出民水火之中耳。使獨夫不死，亦不過如湯之於桀，放之而已。廣臺火焚，紂既自伏，天誅極刑，何必三發？用劍用鉞，縣諸大白，而後為威。劉厥敵，誅殘賊一夫，以示天下諸侯大戮哉！吾聞聖人言：武王未及下車而封黃帝堯舜之後，下車而封夏殷之後，封比干、箕子囚矣。不聞其言未及下車而射紂三發，下車而更擊斬縣旗也。且武王克紂，即以其京師封紂子武庚為殷後，惟紂自焚死而武

王初無所加。故仍立其子而無所疑忌。此聖人至公之心也。若如逸書所言。豈不慮武庚復仇而養虎自貽患乎。逸書出晚周人手。先王訓典與五霸陰謀七雄力征之說雜糅。此篇言武王戮紂之事。正與世傳言載億同。王曰無畏室爾也。非敵百姓也。古武成有血流漂杵之言。本謂商人自相殺。孟子猶以為未可盡信。而云載億乎。凡此皆齊東野語。鋪張失實。有同戲劇。蓋習見戰國殺人盈野。誇如火如荼之觀。而不顧其大謬於事。大悖於道。書大傳絕無此等語。以此見伏學之純。不惑稗官雜

子貢子新書所說。尤見仁至義盡。說武王事。當以
此二書為正。抑又有說焉。天下之怨紂極矣。如新
書所言。紂雖自焚。猶未足厭百姓之心。人心以為
必武王戮之如是而後快。傳說既久。遂以為事實
而筆之書。譬如後世呂政胡亥楊廣。使漢祖唐宗
生得而戮之。天下必無不稱快。辟則為天下戮。有
天下有國者。其可不慎乎。雖然。君臣之義。天地之
常經也。湯武革命。萬不得已而行權也。聖人之弘
而猶自以為有慙德。義士猶或非之。若君非桀紂
之暴。臣非湯武之聖。而敢以下犯上。反易天常。靡

爛生民。則天地所不容之亂賊。終必伏王莽侯景之誅而已矣。又案紂既自焚。而殷民猶踐踏之不止。則當時衆口傳播。必誇張取殘之烈。侈大殺伐之功。不自知其言之過。浸淫增加。歷世既久。遂至如逸書所言。當時夷齊隱於首陽。或因傳聞之言。而興以暴易暴之歎。然以多方多士之文考之。他日殷民為三監煽惑者。絕未聞以三發戡億為辭。則其為誣明矣。即如

國初史案。明之遺臣或有異辭。邇來橫議藉肆。狂狷殊不知當時吏議牽連擬大辟者不可勝數。賴

我

聖祖仁皇帝如天之仁。除確鑿犯案者而人外。一概豁免弗問。拯苦獲垂入無算。性命而保全之。當時有蒙更生之恩而不知。今遭陽九奇厄。內府典冊流落人間。或得舊日案卷讀之。乃知天高地厚之恩所保至大。故友費樹蔚仲深為我言此事。以今況古。則稗官小說矯誣無稽。皆播紳先生所不道明矣。

武王勝殷。殺紂。立武庚。以箕子歸。作洪範。

箋云大傳說。武王勝殷。縉公子祿父。釋箕子囚。箕

子不忍周之釋。走之朝鮮。武王聞之。因以朝鮮封

之。箕子既受周之封。不得無臣禮。故於脫於上字十

三祀來朝。鄭氏曰。祿父紂之子也。武庚字。箕子走

之朝鮮。誅我君而釋已。嫌苟免也。在此封以陳洪範為

史遷說。武王已克殷。後二年。問箕子殷所以亡。箕

子不忍言殷惡。以存亡國。宜告。武王亦醜。故問以

天道。周本紀又說。於是武王乃封箕子於朝鮮。而不

臣也。宋微子世家此以陳洪範為在封朝鮮前**釋曰**牧野之戰。紂自

焚死。云武王勝殷。殺受者。正天誅之辭。猶武成云

咸劉商王紂。孟子云。誅一夫紂也。立武庚者。紂若

不死。不過如湯之放桀于南巢。雖失天下。猶為國君。特不得有為於其國而虐民耳。今紂已死。而殷不可無後。故仍立其子武庚為殷國君。且命管叔蔡叔教之。使行盤庚之政。奉成湯之祀。紂之死。由自殺。武王初無所加。故立其子仍居故都。無所疑忌。武王既封微子於宋。猶不廢武庚。以廣存亡繼絕之義。可謂仁至義盡。武王素重三仁。既禮命微子。封比干之墓。同時釋箕子之囚。使視商典治禮樂之賢臣而復其位。因請與俱歸。而尊以為師。問以天道。而作洪範之篇。馬氏說易箕子之明夷云。

卒以全身為武王師是也。序四句一氣直下明一
年事。經云惟十有三祀王訪于箕子。則此序所言
皆十三祀事也。以上就序本文合經釋之。大傳謂
箕子走之朝鮮。武王因而封之。故來朝以荅禮。王
訪以道。遂陳洪範。江氏申之云。箕子走之朝鮮。已
而聞武王立殷後。遂來歸。承武王問而陳洪範。敘
言以箕子歸。當解為已而箕子來歸。蓋序言箕子
歸者。敘洪範所由作也。言立武庚者。推原箕子所
由歸也。則箕子之歸。不但為受周之封。實感武王
為其君立後故也。朝鮮在中國之外東北海隅。遠

竄海隅。明已不臣于周也。武王封箕子于朝鮮。遠在海外。所以異于中國之諸侯。以示不敢臣之意。以金箕子不誅之志。如此則箕子亦可受之矣。既受周之封。不可金不為臣。故于十三祀來朝也。十三祀者。順經而說也。武王伐紂乃十三年事。此言十三祀。則不出一年內也。計武王誅紂以二月五日。其釋箕子之囚。應即在此時。箕子得釋而來。當亦不甚後。武王于是遣使即就朝鮮而封之。不過兩三月間。箕子既受封。乃後來朝。容可及秋冬之間。猶是十三年也。案江中大傳甚當。傳云於十三

祀來朝。此順經之文。非隔年之辭。請序以字為已。而之已。亦通。若如字讀。則釋囚時。即請與俱歸。受朝鮮封後。又請其傳道覺民。則箕子於義可以來。所謂以箕子歸也。史公則以為十一年克殷。釋箕子之囚。尊以師道。請與俱歸。與論治亂興亡之故。箕子不忍言殷所以亡。而以武王能存亡國。宜告以道。武王覺之。亦恥對其臣。論其君之惡。故問以天道。度二年之久。論道蓋已多。至十三祀。乃為武王陳洪範。武王傳其道。而不敢屈其人。乃封之朝鮮。使得行殷禮。三千年後至我。

朝光緒時。朝鮮人猶有殷之遺俗。箕子之德教遠矣。古今文說不能強合。各逆其志以通之。皆足以垂教也。古者左史記動。右史記言。王與箕子論道時。史官即在旁記錄。但我聞在昔以下。義理至深。文辭廣博。當由箕子自加審定。以成大典。殷曰祀。周曰年。此記周年而云祀者。尊箕子。用殷禮也。故世稱此篇為商書。而微子歸周以存宗祀。則或稱為周書。然編篇必各從其時。方無乖隔陵越之失。今古文同。以大傳史記漢石經考之可見。漢書儒林傳以洪範先於微子。文偶倒耳。又案王

氏謂大傳云於十三祀來朝。疑其意以未朝與釋
 囚非一年。蓋伏生亦以克紂在十一年。訪洪範在
 十三年。與史公同。惟朝鮮先後異耳。鄭於大傳
 隨文注之。而注經不用其說。蓋鄭學宏通。注經必
 折衷至當。而注傳注緯則可博存異義。亦通。

武王既勝殷。邦諸侯。班宗彝。作分器。

宗彝。宗廟尊也。作分器。著王之命及所受物。史記集解

分器亡。漢書史遷作封諸侯。班賜宗彝。作分殷之

器物。班一作般。文釋曰江氏云。邦古封字。漢書嚴

助傳淮南王安上書。稱古者封內甸服。封外侯服。

即周語所謂先王之制邦內甸服邦外侯服也。康
誥敘云邦康叔正義云古字邦封同。周禮司尊彝
掌六尊六彝之位。然則尊彝異名。注云宗彝宗廟
尊者。蓋對文則異。散文則通。尊乃其統名也。釋器
云彝。卣。罍。器也。又云卣。中華也。鄭注周禮。魯人云。
卣。中華。尊者。彝為上。罍為下。是則彝卣罍統名為
尊。故鄭注周禮。敘官云。彝亦尊也。鬱。壺。曰彝。彝。禮
也。言為尊之禮也。案諸侯初封。皆受命器于王。其
物蓋非一。而皆班之宗廟。尊彝使之致孝於先祖。
致敬於山川神祇。為治國保民之本。故特云班宗

彝。彝。盛。祖。壺。禮。祖。壺。圭。瓚。惟上公及有功諸侯乃得賜。王氏謂未必凡諸侯皆得賜彝。但以彝統尊。舉其重者言之是也。史公云作分殷之器物五字。不類篇名。竊意周紀文有脫誤。當云分殷之器物作分器。蓋分殷之器物一句。乃書家申說序語。禮改步改玉。天子建國。乃得班宗彝於諸侯。殷命既黜。則故府彝器自當為周家之用。猶禹鑄九鼎後。後遷於商。又遷於周也。武王初勝殷。即封黃帝堯舜夏商之後。分殷之尊彝等器物以班賜之。故作分器之篇。分器在克殷之初。訪艱在歸周之後。史

敘事故先分器後洪範。書序洪範在前者。自武成
以上皆言武王伐殷事。自洪範以下四篇皆言武
王勝殷後事。而洪範陳天道皇極其事最重。故敘
在先。分器以下皆言懷諸侯柔遠人之事。故類次
之。皮氏不達編書微旨。謂古文家更易兩序次第
以就勝殷訪範在一年之說。不知兩事先後。初不
繫乎訪範之年數。管子云。武王伐紂七年而崩。以
書序十有一年武王伐殷。鄭說按年推之。正密合。
前論之詳矣。

西旅獻獒。太保作旅獒。

𡗗。讀若豪。西戎無君。名强大有政者為酋豪。國人
遺其酋豪之長來獻見于周。疏旅𡗗已遠。箋云𡗗。
馬作豪。曰酋豪也。文釋釋曰鄭注易復象傳云旅客
也。凡遠方絕國王者政教或不及其來朝貢以客
禮待之。西方獻𡗗。𡗗為豪之借。謂西方遠客有來
獻見之酋豪也。太保作旅豪之篇。謂王以客禮待
此豪。懷遠以德也。下旅巢命義同。江氏云。此篇孔
氏古文有之。馬鄭皆及見。必其經文雖作𡗗字。而
其義實為酋豪。𡗗豪音同。古既借字也。故馬鄭皆
讀𡗗為豪。偽孔執泥𡗗字。以為犬高四尺為𡗗。非也。

云西戎无君名彊大有政者為酋豪者。呂氏春秋
恃君覽云。氏羌呼唐離水之西。隸人野人。篇竿之
川舟人。送龍突人之鄉。多无君。高誘注云。西方之
戎无君者。後漢書西羌傳云。不立君臣无相長一
種則分種為酋豪。是西戎无君名其長為酋豪之
明證。按江說甚是。旅𡗗字今古文皆作𡗗。而師說
相承讀為豪。馬本直作豪。鄭則存其本字而正其
讀。孫氏謂文必不从犬。𡗗當為教。或為勢。陳氏謂
今文本作豪。馬氏從之。皆以意推測。未可據。說文
云。𡗗。犬知人心可使者。春秋傳曰。公族夫𡗗。引傳

以證知人心可使之說。無取假契為豪之義。故不
引書也。借契為豪。猶牧誓借玁狁為玁耳。太保。馬鄭
說無攷。王氏云。史記周書並稱武王克殷有召公
奭。不言太保。言太保自成王幼在襁褓中。召公為
太保始。見賈誼新書。史家記事多以其人所終之
官言之。按武王時。惟呂望為太師。不見有太傅。太
保之官。至武王即位。此三公官名始備。故禮有保
傅之篇。而召公為太保。周初太保之官。蓋自召公
始居之。此作旅契之太保。其人當即召公。而其官
則史家遺書。非武王時即為太保也。此篇經內當

書召公序。變稱太保。召誥以下經書太保。序稱召公。王相明。

巢伯來朝。芮伯作旅巢命。

伯。爵也。禮記王巢伯。殷之諸侯。周禮東南方之國

世一見之。詩疏之間。武王克商。慕義而來朝。周禮象

芮伯。周同姓。國在畿內。詩疏旅巢命亡。釋曰王氏

云。魯語。桀奔南巢。韋昭云。南巢。揚州地。巢伯之國。

今廬江居巢縣是也。文十二年左傳。楚人圍巢。杜預

云。巢。吳楚間小國。廬江六縣東有居巢城。是巢為

南方遠國也。居巢故城在今江南廬州府巢縣東。

按桀奔南巢。夏時已有巢國。歷商及周。至春秋時
猶存。周禮大行人九州之外。謂之蕃國。世臺見巢
在南商。平時嗣王即位。乃來見。此時新王易代。自
當來朝受命。又紂播惡四海。如燬之虐。巢亦必及
之。而周之德化。先被江漢之域。聞武王撥亂反正
與天下更始。故慕義而來。王旅而命之。芮伯作其
命辭。殷爵三等。公侯伯。巢在荒服。故其爵伯。猶周
時夷狄爵不過子也。孫氏云。書疏引世本云。芮姬
姓。地理志在馮翊臨晉縣。芮鄉。故芮國。在今陝西
朝邑縣南。

武王有疾。周公作金縢。

箋云有疾下馬氏有不豫二字文釋**釋**曰克商後甫

二年武王疾病。周公以四方未大定。慮王崩。紂黨
或作亂。危周室。害天下。乃作冊告三王。請以身代
武王之死。既告。卜之得吉。乃納冊文于金縢匱中。
序云周公作金縢。謂作此冊文也。其冊文上下記
事之語。則史官所加。以為此冊文而設。故統歸之
周公。自王翼日乃瘳。以上金縢本事也。武王既喪以
下。則史因他日成王感風雷之變。啟金縢之書。覺
悟。迎周公歸攝政。致太平。而終敘其事。以見聖人

至誠格于皇天定周家卜世三十卜年七百之丕
 基立萬世人臣之極則猶詩豳風敘周公之詩太
 師大述其志主意於豳公之事別為一圖以與二
 南雅頌相配也凡經記事連類多者序皆舉最先
 一事以提其綱故堯典敘至舜陟方乃死而序但
 云帝堯將遜于位讓于虞舜作堯典洛誥敘至王
 命周公後而序但云周公往營成周使來告卜作
 洛誥顧命敘至康王即位見諸侯而序但云成王
 將崩命召公畢公率諸侯相康王作顧命此序云
 周公作金縢正同此例明篇內所敘事皆出于此

也。周公納冊金縢命諸史弗敢言。此篇之作必在風雷彰德之後。其文首尾一氣貫串。前後相證。當如古文及鄭注所說無疑。大傳此篇在大誥下。今文家以秋大熟未穫以下為周公薨後事。蓋傳聞之誤。或如鄭君所譏歐陽氏失其本意歟。孫氏割分為二。未敢信。

武王崩。三監及淮夷叛。

三監。管叔。蔡叔。霍叔。三人為武庚監於殷國者也。前流言于國。公將不利于成王。周公還攝政。懼誅。因遂其惡。開導淮夷與之俱叛。此以居攝二年之

時繫之武王崩者其惡之初自崩始也詩東山疏北鄙衛譜

疏二年作一年釋曰江氏云周書作維解云武王克殷乃

立王子祿父俾守商祀建管叔于東建蔡叔霍叔

于殷俾監殷臣故知三監是管蔡霍三人也居攝

二年北鄙衛譜引云一年成王迎周公歸已在秋時

是年即為居攝之一年三監懼誅而叛總在是年

之冬或次年之春大傳云周公攝政一年救亂二

年克殷克殷即謂誅三監及武庚也是三監之叛

在居攝一二年時也其前有周公居東二年則距武

王崩時可四年矣敘必追溯武王崩言之者金縢

云武王既喪管叔及其群弟乃流言于國是其叛
心之萌自武王初崩時始案三監叛在居攝一二
年間距武王崩已五六年作雒解云周公召公內
弑父兄二年又作師旅則作二年為是管叔習見
殷伐兄終弟及武王崩時早存觀覲伺隙而動孟
子曰管叔以殷叛左傳曰管蔡啟商篡問王室蓋
流言及叛管叔首難蔡叔與亂霍叔脅從故此序
總稱三監而下序但云伐管叔蔡叔不及霍叔三
監為管蔡霍作雒解有明文與金縢云羣弟合舊
說或以武庚與管蔡為三監傳聞異說不可據此

淮夷內不止一國。而奄為渠魁。故詩云周公東征
四國是望。謂管蔡商奄也。王氏謂淮夷內有奄無
徐戎。費誓淮夷徐戎並興。無奄。異時異事。不可混。
此三監以殷叛。故下云將黜殷。明殷為其所假之
名所奉之主也。案淮夷助叛。徐戎乘間犯魯。同時
而異事。詳下。

周公相成王。將黜殷。作大誥。

誅之者。周公意也。而言相成王者。自迎周公而來
蔽已解矣。東山點。既退也。疏
箋云誥一作莒。文釋

曰此時周公攝政。云相成王者。攝政正輔相之事。

孟子言舜相堯二十有八載。亦兼歷試及攝位時言。鄭云誅之者周公意者。經云子惟以爾庶邦予伐殷逋播臣。是主黜殷者周公也。而主相成王者。王迎周公歸。蔽己盡解。心悅誠服。惟公是從。其出於周公意。與出於成王意同。以此知後必更無信讓疑公之事。奔楚之說。齊東野語不足信也。黜殷下唐石經初刻有命字。段氏謂正義本有命字。下序云成王既黜殷命。與此文正相銜接。有者是也。韋字說文所無。或下从丁。與興同意。

成王既黜殷命。殺武庚。命微子啟代殷後。作微子之

命

黜殷命。謂殺武庚也。微。采地名。微子啟。紂同母庶

兄也。武王投之於宗。因命之。封為宗公。代殷後承

湯祀。詩有微子之命亡。**箋云**史遷說初管蔡畔周。

周公討之。三年而畢定。故初作大誥。次作微子之

命。次歸禾。次嘉禾。次康誥。酒誥。梓材。紀周本又說周

公既承成王命。誅武庚。殺管叔。放蔡叔。乃命微子

開代殷後。奉先祀。作微子之命以申之。罔于宗。微

子故能仁賢。殷之餘民甚戴愛之。宋微子世家**釋曰**樂

記說武王投殷之後於宗。注云。投。舉徒之辭。禮。誅

君之子不立。武王救民水火。其處紂本意。不過如
湯之放桀。及紂自燔。憐而仍立其子。為王者後。以
奉湯祀。蓋命為殷公。而別封微子於宋。以廣存亡
繼絕之義。微子殷時本食采畿內。武王從而增封
之於宋。及武庚以叛被黜。乃專以宋承殷後。爵為
上公。周公攝政六年制禮。公地方五百里。故宋在
春秋初為大國。此皆周公所為。云成王者。周公初
以身當大難之衝。征伐將畢。乃請成王蒞師。歸功
於君也。逸周書云。王子祿父北奔。蓋出而走死。曰
殺者。正名討罪之辭。武庚為紂子。既命承湯祀。四

親廟中當祭其父。微子代為殷後，則紂不得與祭。惟上承契及湯至于帝而已。凡封國皆有命書，其告戒尤詳者，則謂之詰。傳稱命以康誥，命以唐誥，是也。

唐叔得禾，異畝同穎。

二苗同為一穗。史記
箋云史遷未作嘉穀，畝作母。

大傳說：成王之時，有三苗貫桑葉而生，同為一穗。其大盈車，長幾充箱。民得而上諸成王。王召周公而問之，公曰：三苗為穗，抑天下其和為一乎？果有越裳氏重譯而來。釋曰唐叔成王母弟，名虞。成王封

之於唐。後改爲晉。得禾者。此時未封唐。於其所食
采地內得異禾也。史公禾作嘉穀。謂黍稷。即今之
小米。異畝同穎。史公畝作母。據鄭注及大傳。則畝
爲母之借。畝母聲轉。母禾莖也。穎禾穗也。或二莖
或三莖。本異而末相交并合。同爲一穗。是保合太
和。天下種類別異者皆合同。中國夷狄共戴一君
之象。或以異畝爲異莖。謂兩莖之和交合而共成
一穗。亦通。后稷教民稼穡。功垂萬世。子孫恆有穀
瑞。至成王周公時而極盛矣。序云王命歸周公于
東。大傳云召周公而問。傳述稍異。或兩時事。

獻諸天子。王命唐叔歸周公于東。作歸禾。

歸禾亡。箋云史遷東作兵所歸作餽釋曰獻諸天

子有嘉瑞必以上聞也。王命歸周公。以此瑞為周公盛德所致也。時周公方東征。兵所即東。據此則東征在王啟金縢感悟後明矣。歸與饋餽字通。

周公既得命禾。旅天子之命。作嘉禾。

受王歸已禾之命。與其禾。疏箋云史遷旅作魯本

紀一作嘉。魯世家旅陳也。詳釋曰周公既得王命書

與所歸之禾。乃陳述王命以告軍中。嘉美其事。作嘉禾之篇。善則歸君也。此時成王周一德一心。天

下將太平。其有嘉禾之瑞。宜矣。旅。或與旅。豪旅。巢
命之旅同。謂受命後。以禮饋唐叔也。旅。古文作𡳿。
與魯同字。故或借作魯。

經 周公奉鬯立于阼階。延登。贊曰。假王蒞政。勤和天

下。
漢書王莽傳
延嘉禾節

釋 江氏云。陳天子之命。當在廟中。時無廟。當為

壇。壇宮以象廟。于其中。陳之。鬯者。釀秬為酒。芬芳
條鬯。故曰鬯。所以禮神。阼階。東階也。延。進之也。後
從後。詔倩曰。延。周公奉鬯立于東階。贊者。延之登
堂。乃贊曰。假王蒞政。勤和天下。此成王命。書發端

之語也。假升。莅臨也。蓋王以嘉禾之瑞歸美于公。言公升王位臨政事。勤勞變和天下。其下當言致治升平天報休祥之意。今其書亡。餘文不可得聞矣。明堂位曰。周公踐天子之位以治天下。是假王莅政之事也。案嘉禾不在孔氏逸書內。蓋十六篇外零章殘句。僅有存者。不可以其引自愼邪而廢之。

成王既伐管叔蔡叔。以殷餘民封康叔。作康誥。酒誥。梓材。

言伐管蔡者。為因其國也。不言霍叔者。蓋赦之也。

詩邶衛諱政康為號諡。武初封于衛。至子孫而并邶鄘

也。武**劉**云詩譜曰邶鄘衛者商紂畿內方千里之

地。武王伐紂。以其京師封紂子武庚為殷後。乃三

分其地置三監。自紂城而北謂之邶。南謂之鄘。東

謂之衛。成王既黜殷命。殺武庚。復伐三監。更於此

三國建諸侯。以殷餘民封康叔于衛。使為之長。後

世子孫稱并彼二國。混而名之。封一作邦序疏引解

曰周公作大誥。惟聲武庚通播之罪。而於三監則

隱其辭。但王法不可私。故既誅武庚。即撤三監。而

分別其罪之輕重為處置之方。管叔為戎首。蔡叔

同惡既撤其監遂除其國勢不得已霍叔或係脅從但撤其監而霍叔如故管叔自以罪大恐不免未及周公設法保全先自經死子孫或逃竄遠方蔡叔得盡天年周公舉其子命之王仍邦之蔡說詳前管蔡霍其所封之國邠鄘衛其所監之地三監既撤乃封康叔於衛更為邠鄘連屬之監鄭云因其國謂因管蔡等所監之地也揚子法言云書序有百而酒誥之篇俄空段氏謂闕其序非失其經近是然亦恐未確互詳酒誥經末成王在豐欲宅洛邑使召公先相宅作召詔

欲擇土中建王國。使召公在前視所居者。王與周

公將自後往也。詩王城
箋云成王之言曰。惟余一

人營居于成周。惟余一人有善。易得而見也。有不

善。易得而誅也。春秋長利周書作維解曰。乃作大邑

成周于土中。釋曰周公以維邑居天下之中。四方

諸侯朝貢道里均。成王以王都在土中。善不善易

彰顯於四方。作洛之義實兼茲二者。成王欲宅洛

邑。而云成周者。江氏云。成周與王城相去五十里。

皆在維邑。宅維實兼王城成周言之。周書云。作大

邑成周于土中。是宅維邑即為定成周也。案大傳

云周公攝政五年營成周。正兼王城成周言之。蓋對文。王城與成周異。散文則通稱成周也。大傳意蓋以五年作洛作召詔。七年致政成王作洛誥。據經文召公相宅乃卜。卜吉致位。位成王與周公蓋先後從後至。周公達觀于新邑營。命庶殷丕作。王繼至。召公乃與庶邦冢君取幣錫周公。曰拜手稽首。旅王若公云云。直至篇末皆誥辭。是召誥之作。在作洛初興工時也。洛誥篇首云復于明辟。篇末云王在新邑烝。是洛誥之作在七年歲終致政時也。史公於魯世家以召誥洛誥皆在七年作。於周

本紀又以為七年致政後作。蓋所據記載不同。或別有微旨。然四年即謀作大邑。必不遲至歸政後。大傳敘周公攝政七年事。一一分明。必相傳古訓。互詳經篇目下。

召公既相宅。周公往營成周。使來告卜。作洛誥。

居攝三年。天下太平。而此邑成。乃名曰成周也。公

傳宣十六年疏

釋曰史承上序而舉其略。以二篇經文推

之。蓋召公相宅即卜。此經所謂我乃卜澗水東瀍水西。惟洛食也。周召一體。故召公卜而周公云我卜吉。召公遂使告王於鎬京。尋周公至。觀新邑營。

行郊社禮。作洛遂興工。周召二公在洛待王至。以諸侯見。召公與諸侯取幣以王命錫周公。遂陳誥。王在洛未即歸鎬。周公往營成周。亦至即卜。經所謂我又卜瀍水東亦惟洛食也。卜吉。周公又使告王於洛。故序云使來獻卜。周召告卜凡兩使。而事皆統於周公。故王曰公既定宅。俾來來視。予卜休。恒吉。此皆攝政五年事。至七年歸政復辟作洛誥。周公首述其事。故洛告序特舉之。非洛誥之作即在獻卜後也。王城成周蓋並於五年營就。鄭注云七年者。因經末惟七年成文而統括言之。王氏云。

詩維天之命序筮以告太平在居攝五年清廟序
筮以成洛邑亦在居攝五年然則以注當云五年
太平成洛邑而云七年者以居攝實終于七年太
平之功至此方畢故鄭統言之案王說甚是或曰
七當為五字之誤

成周既成遷殷頑民周公以王命誥作多士

此皆士也周謂之民民無知之稱謝疏釋曰據經
文則此所遷者皆殷在朝有爵位治事之人經謂
之士而史家作序以頑民書之識者謂在殷為義
在周為頑是不盡然此等人初時實主黃子篚以

迎周師。及管蔡奄君煽亂。乃從武庚叛。是其冥頑
無知。初非伯夷叔齊之清。箕子商容之賢。故周人
以其心不則德義之經。而謂之頑民。然聖人善善
從長。惡惡從短。故周公呼為多士。且曰爾殷遺
多士。蓋作新大邑。使厚被新王之化。而殷勤誥導。
又曲諒其有故國之思也。若伯夷叔齊。則太公謂
之義。周公謂之正。方見多當小腆紀敘時。拒之曰非吾
事也。故周人稱之永久不衰。武王克商。遷九鼎於
雒邑。義士猶或非之。正謂夷齊非此多士。曰或見
非之者甚少。不聞成王定鼎。尚有非之者也。殷時

卿士師師非度。革而竊存。沈酗于酒。今雖大和會。而舊染未易盡革。故遠近王都。使節性懷德。日遠善不自知耳。其中亦有賢者。故逸周書又謂之獻民。亦周公云惟聽用德。與人為善之意也。

周公作無逸。

箋云。逸。史。逸。作佚。**釋曰**。不言作意者。經文自明。不待言也。段氏云。周本紀曰。成王既遠殷遺民。周公以王命告。作多士。無佚。魯世家曰。周公歸。恐成王壯治有所淫佚。乃作多士。作毋逸。本紀言作多士。而兼舉無逸。世家作無逸。而兼舉多士。案兩文疑。

各有衍字。但世家述無逸中又雜以多士成湯至于
帝乙一段。或可史公意多士難以告殷士亦寓戒
王之意。得非自康誥至君奭皆詳論政治。故相連
屬。成王征三篇。則聲罪致討。晚諭之辭多。而論治
之語較少。故退在下乎。然蔡仲之命。費誓二篇。何
以雜在穆王書中。則今本編次有不能曲為推說
者。故鄭君云未聞。其不可盡執以定時事。先後明
矣。

召公為保。周公為師。相成王為左右。

此師保為周禮師氏保氏大夫之職。賢聖兼此官。

疏云馬氏曰師氏保氏皆大夫官分陝為二伯東為左西為右釋曰三公下兼師氏保氏及為王傅者稱太師太傅太保成王初立時太公為太師周公為太傅召公為太保及周公歸政後成王以周公為太師或其時太公已薨周公代之而以畢公為太傅或師保疑丞之官不必備亦不妨重成王尊周公與太公並稱太師而四輔前後左右之職如故成王作周官篇據當時三公兼師保傅之職而言故以太師太傅太保為三公若其不兼師保傅之職則直稱司徒司空而已太

師等非常職。故周禮惟有師氏保氏。不列此三官。
詳微子父師少師下。召公為太保久矣。周公歸政
後始稱太師。以聖兼師以賢兼保。故序特云召公
為保周公為師。左右者。馬以分陝言。春秋傳所謂
自陝以東周公主之。自陝以西召公主之。謂王官
之伯。內輔天子。外統諸侯也。

召公不說。周公作君奭。

周公既攝王政。不宜復列於臣職。故不說。疏

葵云

馬氏曰。召公以周公既攝政。致太平。功配文武。不
宜復列在臣位。故不說。以為周公苟貪寵也。史記

燕世

解家集

釋曰

不說。非以周公為不然也。蓋以周公致

太平制禮作樂。復子明辟。天下皆明其道。皆見其誠。洛誥曰。茲予其明農哉。功成不居。盡美盡善矣。乃成王留之。仍為太師。列於臣職。無識之人。見王尊禮周公。大封魯國。廣立凡蔣邢茅胙祭。疑公猶有為子孫計之意。身留在朝。則王之恩寵將有加。無已。此與公敝屣天下之心正相反。本無足重輕。然以公之盛德。而致此微嫌。故不說。時成王已能揜迹於文武。在朝百官。莫非其人。老臣如太公久已之國。周召亦皆已甚老。故召公以欲致仕。諷動公。此

不說與論語子路不說同。謂心說中偶有未愜。子路聞夫子之言而即悟。召公亦聞周公之言而意即解也。經曰。我不以後人迷。傳稱周公不欲王更加厚賜於魯。致政後三年即老於豎。召公既說周公之言。不復求去。直至成王崩。康王立。尚在朝。二公薦桀之忱。進退之度。始終合一也。燕世家以召公不說為在攝政時。然爾時周公為傅。非為師也。詳篇目下。

成王東伐淮夷。遂踐奄。作成王政。

奄國在淮夷之北。集解踐。讀曰剪滅也。凡此伐諸

叛國皆周公謀之。成王臨事乃往。事畢則歸。後至
時復行。詩破此伐淮夷與踐奄是攝政三年伐管
蔡時事。其編篇於此。未聞。政成王政亡。**箋云**馬氏
政作征。曰征正也。釋孟子說周公伐奄三年討其
君。又說周公兼夷狄。大傳說踐之者。籍之也。籍之
謂殺其身。執其家。猶其宮。又說周公攝政一年救
亂。二年克殷。三年踐奄。史遷踐作殘。說云召公為
保。周公為師。東伐淮夷。殘奄。為師下恐有**釋曰**大
誥序云三監及淮夷叛。周公相成王。將黜殷。則當
時叛者殷也。三監也。淮夷也。而三監之中管蔡罪

重淮夷非一奄為渠魁。故詩云周公東征四國是
皇。傳云四國管蔡商奄也。則管蔡商奄淮夷皆東
征所必誅。前序言成王黜殷殺武庚。伐管叔蔡叔。
此伐淮夷踐奄及下二篇。正其時事。而經與序皆
割分二處者。孔子編篇必有微旨。或可自康誥至
無逸。雖作書所主不同。而皆寓戒王之意。君奭亦
聖賢相與戒勉。連類次之。成王政三篇。則專為聲
罪致討及曉諭殷民及庶邦之語。故退在後。鄭以
先師無明說。且如蔡仲之命費誓等。編次前後。必
有錯亂失其舊第。故云未聞伐淮夷特云踐奄者。

淮夷之中奄為渠魁。故翦而籍之。孟子所謂討其君。大傳所謂殺其身執其家是也。下云逮其君于亳姑者。蓋不絕其祀。別立其族人為君而逮其國。不使繫任人之餘惡。亦仁之至義之盡也。此篇所記皆伐淮夷踐奄之事。東征之功至是而成。故名成王征。猶商書之湯征。作政者。同音假借字。江氏云。伐諸叛國皆周公謀之。但目功皆統歸于君。凡周公所伐。縱使成王不親行。史文自必稱成王伐之。鄭必知此諸敘稱成王伐是成王臨事乃往者。以多方敘云成王歸自奄。在宗周。詰庶邦。周官敘

云成王既黜殷命滅淮夷。還歸在鄴。是皆說成王
 親征而返也。素周公征諸叛國既克。乃請成王臨
 之。已當大難之衝。而功歸於君。且使王歷練軍事
 也。鄭讀踐為翦。史公踐作殘。皆以音近字正。請。史
 以召公為保。周公為師。二由冠東伐淮夷上。文似
 不屬。或此述君喪序有脫句。史公分散數家。或不
 主一說。周本紀不必與燕世家同。姑存一說備考。
 鄭云奄國在淮夷之北者。孫氏云。奄在魯南淮
 北。此言甚當。蓋魯與齊接壤。齊在北。屬青州。魯在
 南。屬徐州。禹貢云。海岱及淮惟徐州。鄭云。徐州界

又南至淮水。則淮夷在魯南。今與淮夷同類。稍在北。亦於魯為南。周公初封於魯。地方百里。奄在魯境外。故得與管蔡等同叛而見滅。至成王即政。加封周公七百里地。則奄地盡在魯邦域之中。復安能叛。何以踐為偽。孔造為兩次踐奄之說。皮氏堅持以取鄭。將何以解此。費誓之作。當亦在伐管蔡。黜殷踐奄時。見魯世家。蓋周公封魯。使伯禽代之。圖周公伐淮夷踐奄。伯禽征徐戎也。餘詳費誓。呂氏春秋古樂篇云。商人服象為虐于東夷。周公遂以師逐之。至于江南。孫氏謂據此似伐奄直至于

楚案此與逸周書征熊盈及孟子說周公懲荆舒

合

成王既踐奄將遷其君于蒲姑周公告召公作將蒲姑

奄既滅矣其君佞人不可復故欲徙之于齊地使

服于大國詩破將蒲姑亡**箋五**史遷蒲作薄馬氏

同文釋曰薄姑齊地**集解****釋曰**奄既滅君已誅古者

滅國不絕其祀或立其族人使為小侯但奄君佞

人今雖誅之而別置君恐其邪說餘毒猶足惑人

不可使新立之君復居故處重為亂階故自魯南

達至於近齊之地。舊蒲姑氏之境。蓋使為附庸於齊。不復能為亂。周公告召公使董理其事。作將薄姑。將行也。謂達而行之。知所誅之奄君是佞人者。大傳說奄君薄姑謂祿父曰。武王既死矣。今王尚幼矣。周公見疑矣。此世之將亂也。請舉事。是祿父之叛。奄君實引誘之。凡大傳所說奄事。蓋皆出成王征及此篇。又有揜誥之目。或即此二篇異名。但大傳以薄姑為奄君之名。與序及左傳不合。或傳寫誤字。或其名偶與後所達之地名同。蒲薄一聲之轉。字形又近。左傳晏子曰。昔爽鳩氏始居此地。季

荊因之。有達伯陵因之。蒲姑氏因之。而後太公因之。蓋蒲姑氏殷末諸侯。亡於殷周間。武王封太公於其地。亦為百里。成王周公遷奄於齊近地。在古蒲姑氏境內。周公致太平。成王加封太公五百里。則所遷之奄亦在其邦域中。如顯史之於魯矣。

成王歸自奄。在宗周。誥庶邦。作多方。

釋曰東征之功至踐奄而成。周公請王視師。畢即歸鎬。故經曰王來自奄。至于宗周。序云在宗周。明王已安至京師也。時周公尚有善後諸事。未即歸。乃以黜殷應天救民大義。及以後與天下更始一

視同仁之意。曉告庶邦。作多方篇。此篇雖兼告庶邦。實皆論殷周事。明是主為黜殷而發。偽孔以為成王即政。復淮夷及奄再叛再征。則但當責其反覆無常。何用多論受命割殷事。且其辭較多士專告殷士者更詳乎。孔疏謂經云戰要囚之。至於再。至於三。若止一次叛而征之。但可云再。不可云三。不知武王伐紂。殷人玄黃。革壺以迎。奄與淮夷皆未加兵。並無戰要囚之事。則一叛一征。亦不得云再。所謂再三者。周公東征三年。必屢有條教。曉諭。恐猶有不用命。以自取討。雖無可寬宥者。故為此

言耳。餘詳多士。昔朕來自奄。節及篇末。

成王既黜殷命。滅淮夷。還歸在豐。作周官。

周官亡。〔箋云〕史遷黜作紂。滅作紂。說曰。興正禮樂。

度制於是改。而民和睦。頌聲興。〔周本紀〕又說。成王在

豐。天下已安。周之官政未次序。於是周公作周官。

官。別其宜。作立政。以便百姓。百姓說。〔魯世家〕鄭以周

官在立政前。〔疏〕典今本序在後。〔釋曰〕成王歸宗周

鎬京。周公尚在外。撫定四國遺民。作多方。其後周

公歸。當自鎬至豐。告文王廟。成王已先來歸。自鎬

而至豐。是時殷民黜。淮夷滅。天下盡平。於是偃武。

修文。正周之官制。作周官。其後作周禮六篇。本此。又其後作立政篇。教王本此意以行政。序曰成王既黜殷命。滅淮夷。此總結東征之事。言黜殷命。則三監在其中矣。言滅淮夷。則奄及諸叛國在其中矣。還歸在豐。承上歸自奄在宗周而言。蓋還歸自奄。既在宗周。又自宗周而至豐。豐鎬相去二十五里。時時往來。召誥云。王朝步自周。則至于豐。序云。成王在豐。欲宅洛邑。正與此同。史記此處皆直錄序文。略釋其義。不暇分別先後。據云周之官政未次序。又云度制於是改。正惟四國初平。天下初定。

故云然。皮氏等以為在成王即政數年後。則去制
 禮作樂已多年。豈官政尚未次序。制度尚未改乎。
 欲借史記以駁鄭。不知適與史公意相刺謬矣。云
 民和睦頌聲興者。自是遂致隆平。民大和會也。周
 禮天官小宰注云。成王作周官。有述天授位之意。
 故周公設官分職以法之。鄭志趙商引周官逸文。
 則此篇雖亡。而其遺文或見引於古書。鄭氏師弟
 猶及見之。故知其作在制禮前。而周禮三百六十
 官取法天象。正本此意。官別其宜。此篇略舉大意。
 其詳盡在周官也。立政與此篇非一時作。以義類

相附。史亦連說之。偽孔以周官次立政後。皮王以周官為與立政同時作。皆謬。

經立太師太傅太保。茲惟三公。鄭志趙商引

釋曰此十一字。遺文僅存者。成王之初。太公為太師。周公為太傅。召公為太保。其後司徒公司馬公司空公下兼師氏保氏。及為王傅者。則有此稱。非常官。故不在周禮三百六十官之內。前已備論之。周公作立政。

釋曰與上篇以類相次。不言作意者。經文自明。

成王既伐東夷。息本據鄭慎來賀。王俾祭伯作賄。息慎

之命。

息慎。或謂之肅慎。東北夷。史記集解肅慎之命

亡。箋云息。今本作肅。史遺亦作息。俾作賜。馬氏俾

作辨。曰。息慎。北夷也。釋榮伯。周同姓。畿內諸侯為

卿大夫也。史記集解。釋曰。江氏云。東夷。蓋謂淮夷奄也。

以上諸敘。承伐淮夷踐奄而秣言既滅後之餘事。

此言既伐。又承上為文。則所伐即上敘所云淮夷

及奄。皆瀕東海。皆東夷也。業息肅一聲之轉。春秋

傳曰。肅慎奄亳。吾北土也。肅慎。北夷而偏於東者。

聞東夷滅而貢物來賀。王嘉其慕義而於禮終賄。

以送之。使榮伯作賄息慎之命。俾使也。聘禮曰賄。用束紡。記曰賄。在聘于賄。江氏云。賄。財也。主國贈賓之禮也。案左傳每言自郊勞至於贈賄。朝聘之禮終於贈賄。或息慎所貢方物多。王賄之厚。故作賄息慎之命。其命辭使榮伯作之。猶武王時巢伯來朝。芮伯作旅巢命。彼亦當王使作之。文不具耳。史記俾作賜。蓋其本作界。謂王以息慎所貢物分賜榮伯。則當於伯字絕的。馬氏俾作辨。如讀從士虞記。以其班祔。古文作辨。則訓為班。賜與史記同。讀從堯典辨秩。馬本作華。則訓為使。皆可通。榮伯

蓋即十亂中榮公。或其子。國語有榮夷公。其後也。周公在豐將沒。欲葬成周。公薨。成王葬于畢。告周公。作亳姑。

亳姑亡。箋云大傳說。三年之後。周公老于鄴。心不敢遠成王。而欲事文武之廟。後周公疾。曰。吾死必葬于成周。示天下臣于王。又云。成王曰。周公生欲事宗廟。死欲聚骨于畢。畢者。文王之墓地。故周公死。成王不葬于周。贈成而葬之于畢。示天下不敢臣也。所以明有功尊有德。故忠孝之道。盛在成王周公之間。故魯郊。成王所以禮周公也。釋曰江氏

云。三年之後。謂致政三年後也。葬于成周。若為成王終守成周。以見臣于成王之意。案荀子云。周公歸周。蓋歸其采地。在豐者。自其采地至豐。蓋公時時至豐。欲近文王廟也。周公告歸後。去病憂時。若干年不可考。度年在百歲左右矣。心不敢遠成王。故不之魯。欲事文武廟。則恒往來豐鎬也。公為成王營洛邑。為王居正位。而更營成周。以陪上都。故欲葬於此。示臣於王也。成王言周公生欲事宗廟。死欲聚骨於畢者。公雖遺言欲葬成周。然生既欲事宗廟。死必願聚骨於畢。與文武近。此成王善推

周公之意也。畢者。文王墓所在。太誓曰。太子發上祭于畢。孟子曰。文王卒于畢。鄧武王從文王葬。今又使周公從之。所以體周王至孝之心。且見公爲文武之臣。非已所得而臣也。周公事成。王純乎臣道。忠也。成王不敢臣周公。敬周公如尊武王。孝也。告周公者。以不從公遺言而葬公于畢之意。告于公殯。又以天子之禮葬公。以彰公功德。是時天又有雷雨之變。以啟王心。使無疑於尊公之大禮。經中有其事。伏生傳其說。與金縢秋大熟一章。劃然兩事。而書家誤合之。余於金縢辨之詳矣。作毫姑。

者舊說謂告周公語中涉及奄君蒲姑事。然此時去踐奄久矣。無緣涉及。段氏謂奄君名作蒲作薄。不作毫。足發其蒙。愚謂商書序云。沃丁葬伊尹于毫。周之於文武。猶伊尹之於湯也。沃丁蓋以非常隆禮葬伊尹于毫。使從湯墓。成王以天子之禮葬周公于畢。使從文武墓。其義正同。經中蓋述伊尹葬毫故事為比。故篇名毫姑。姑者。故之假借字。

周公既沒。命君陳分正東郊成周。作君陳。

天子之園五十里為近郊。君陳近郊半遠郊。禮記疏。東郊周之近郊也。蓋五十里。今河南洛陽相去

則然。禮記王君陳亡。箋云坊記注曰。君陳。蓋周公

之子伯禽弟也。詩周南召南譜曰。周公封魯。死。謚

曰文公。元子世子。其次子亦世守采地在王官。春

秋時周公是也。釋曰洛邑為王都。其制度官府蓋

與西都同。成周在其東郊。殷民所遷處。必有大臣

鎮守撫綏之。周公以太師在王朝。且為陝東之伯

統治東方。必時往勞來。周公既沒。使君陳分任正

治王城之東郊成周。作書命之。名曰君陳。

經爾有嘉謨嘉猷。入告爾君於內。女乃順之於外。曰

此謀此猷。惟我君之德。於乎。是維良顯哉。禮坊記引

箋云鄭氏曰嘉尚也。猷道也。於乎是惟良顯哉。美君之德。**釋曰**坊記引此經以證善則稱君之義。嗚呼是惟良顯哉。自是美君之德。人臣一進可嘉尚之謀與道而歸諸君。且稱譽之。江氏謂此臣下相勉效忠歸美之辭。故記引為證。偽孔取此文而增竄之。且入之成王語中。是據善且導諫矣。豈成王之賢而若是乎。証甚矣。

經未見聖。若已弗克見。既見聖。亦不克由聖。經衣引

箋云鄭氏曰克能也由用也。

經出入自爾師虞庶言同。經衣引

箋云鄭氏曰自由也師庶皆衆也虞度也言出內政教當由女衆之所謀度衆言同乃行之政教當由一也。

成王將崩命召公畢公率諸侯相康王作顧命。

回首曰顧。疏臨終出命故謂之顧。顧將去之意也。

史記集解

箋云馬氏曰成王將崩顧念康王命召公畢

公率諸侯輔相之。**釋文**

康王既尸天子遂告諸侯作康王之誥。

箋云馬本康王上有成王崩三字。**釋尸主也。諱史**

遷康王之誥作康誥。**釋曰**江氏云主天子之位即

經所謂王出在應門之內之位也。敘不言即位而
言既尸天子。明非踰年即位而誥諸侯。實即受顧
命訖。權主天子位。以朝諸侯而報誥之。馬本有成
王崩。古文較備。容鄭本同。史記作康誥。傳寫脫字。
康王命作冊畢。分居里成周郊。作畢命。

今其逸篇有冊命霍侯之事。不同同字。與此序相
應非也。疏畢命亡。箋立。史遺冊作策。畢下有公字。

釋曰據史記則畢下脫公字。分居里成周郊者。洛
邑為王都。成周即其東郊。以遷殷頑民所在。故分
為下都。使大臣居而正理之。勞來鎮撫。使無反側。

而日遷善。周公既沒，命君陳主其事。此時蓋君陳
又沒，命畢公統之，分居里成周郊。猶君陳序云分
正東郊成周里，請為理治也。鄭云今其逸篇有
冊命霍侯之事，則是命霍侯，非命畢公，與序不相
應。非此序所謂畢公也。注同字衍文。鄭數逸十六
篇之目，有冊命無畢命，則命霍侯之書，乃孔壁逸
書外別得之者，文不相應，故鄭辨之。漢書所引亦
殘文零句，不知即命霍侯書否，姑錄於下以備考。

經 惟十有二年六月庚午，肅王命作策，豐刑。漢書律

釋曰 律歷志云：康王十二年六月戊辰朔三日庚

午。故畢命。豐刑曰云云。案逸文但云作策。豐刑而志繫之畢命。自必當時以此篇為畢命也。豐刑之義不可得詳。

穆王命君牙為周大司徒。作君牙。

君牙亡。案云牙一作雅。文釋曰江氏云穆王康王

之孫。大司徒。地官卿也。案據春秋傳穆王不無失德。然能任賢用能。哀矜折獄。猶為周家振作有為恤民之主。故天下諸侯不輟事者。

經夏暑雨。小民惟曰怨。資冬祁寒。小民亦惟曰怨。禮記

衣

箋云鄭氏曰雅書序作牙假借字也君雅周穆王司徒作尚書篇名也資當為至齊魯之語聲之誤也祈之言是也齊西偏之語也夏日暑而小民怨天至冬是寒小民又怨天言民恒多怨為其君難

釋曰夏暑冬寒時育萬物之正民猶苦而有怨况人君政教或有所偏乎是以聖王勤恤民隱養而教之使得其所以贊天地之化育

穆王命伯冏為周大僕正作冏命

冏命逸

箋云

冏本作𠂔史達說穆王閔文武之道

闇乃伯冏申誠大僕冏之政作冏命復宣說文曰

下當有周書曰伯

𪔐
𪔑

四

史公說蓋本孔安國故據逸篇為義也

國字當在繫命下。復宣上三字為句。江氏云。僕侍

御于尊者之名。太僕正其長也。周禮太僕下大夫。

二人政官之屬也。素侍御之臣於君最親。故周公

作立政於虎賁綴衣等曰知恤鮮哉竊意昭王南

征或侍御者非其人。省視王舟不審。而聽奸人以

新奇適觀之器進王。遂陷膠舟之禍。天下幾殆。故

穆王慎選通臣命伯固為太僕正使申誠侍從諸

臣所掌之政。左右前後勿以儉人。其惟吉士。而國

復宣。蓋懲前毖後。猶有先王修身勤政任賢之道。
法焉。固字大傳亦作𦵏。蓋今古文皆作𦵏。人名無
取驚走。且其字難識。故師讀為固。

蔡叔既沒。王命蔡仲踐諸侯位。作蔡仲之命。

蔡仲之命亡。箋云春秋傳曰。管蔡啟商。暮間王室。

王於是乎殺管叔而蔡蔡叔。以車七乘徒七十人。

其子蔡仲改行率德。周公舉之以為己卿士。見諸

王而命之以蔡。

定四年左傳

釋曰周公不及保全管叔

而存其後。蓋深以為痛。猶幸蔡叔及救而其子又
賢。故未滅叔罪而舉仲。卒復其國。仁人之於昆弟。

不藏怒焉。不宿怨焉。親愛之而已矣。周公之心與
大舜一也。成王因周公之請而遂命蔡仲。亦可謂
惠焉。敘不施其親矣。直云王命者。善則歸君。周公
之志。史官書法也。堯典疏云。孔以蔡仲之命次君
奭。第八十三。鄭以為在費誓前。第九十六。又云。鄭
依賈氏所奏別錄為次。案此及費誓。以成王時書
雜穆王書中。顯依簡冊脫亂。漢師仍其舊。慎也。偽
孔始以已意變置。孔子曰。吾猶及史之闕文。今亡
矣夫。此之謂也。

經

王曰。胡。毋若爾考之違王命也。

定四年
左傳

釋曰傳引命書之辭。胡蔡仲名。

魯侯伯禽宅曲阜。徐夷並興。東郊不開。作柴誓。依周禮雍

氏禮記曾子問鄭注引

翼云馬氏開作開。釋今本柴作費。**釋曰**武王封周

公於魯。即都曲阜。明堂位云。成王封周公於曲阜。

據後增封七百里言之耳。但周公為冢宰留輔王

室。使元子伯禽代之國。居曲阜敦治。故曰魯侯伯

禽宅曲阜。應劭云。曲阜在魯城中。委曲長七八里。

徐夷並興者。徐戎與淮夷。朋比為惡。方周公討淮

夷時。徐戎將攻魯東。以掣其肘。故東郊屯兵守禦。

關津。不令開關通行。以防謀賊。魯公帥師出征之。
至費地而作誓。開字蓋本作關。即古關字。馬氏作
關訓開。關與開形近義同。後人遂改為開。案字據
周禮禮記注則鄭本作案。與說文同。據史記集解
案隱稱書皆作案。則唐初偽孔本猶然。後人乃用
索隱說改為費耳。堯典疏云。鄭以費誓在呂刑前。
第九十七。案字今文或作肝。或作鮮。書大傳鮮誓
亦列甫刑前。

呂命穆王訓夏贖刑。作呂刑。

箋云史達說。甫侯言於王。作修刑辟。**釋曰**江氏云。

呂侯受命于穆王。訓說夏后氏贖刑之法。又曰。命由王出。自上詔下之言。故解呂命為呂侯受命。孫氏云。鄭釋經呂命以為呂侯受王命。洛誥云。佅來。毖殷乃命。宣亦是受命于宣王也。案命受命也。上言穆王命君牙。命伯冏。皆自上命下。文義直捷。此變其文者。蓋穆王命呂侯入相。呂侯以恤刑言於王。王即命之訓。夏贖刑以告諸侯。故經發首曰。惟呂命。序順經文而云呂命。穆王訓夏贖刑。謂呂侯受命於王而修刑也。篇中所言。皆呂侯受王命作訓之辭。或以命為告。謂呂侯告王。讀經惟呂命王。

為引。緇衣鄭注傳說作書以命高宗為例。恐未是。彼注命字。據疏疑誠字之誤。

平王錫晉文侯秬鬯圭瓚。作文侯之命。

箋云馬本無平字。錫作賜。**釋曰**江氏云。平王。幽

王之子。穆王八世孫也。幽王娶申女以為后。生太子宜臼。又得褒姒。生伯服。而黜申后。廢宜臼。宜臼奔申。申侯與犬戎攻宗周。弑幽王于戲。晉文侯鄭武公迎宜臼于申而立之。是為平王。故國語曰。晉文侯於是乎定天子。此之謂也。平王嘉文侯之功。故賜之以鬯鬯圭瓚。案馬本無平字。然釋文正義

不言焉與鄭及偽孔有異義。則亦以王為平王。書序稱王者。如武王成王康王穆王皆舉諡。此偶脫耳。史公以王為襄王。文侯為文公重耳。據此篇辭意。與左傳策命晉文之辭絕不類。恐沿今文家傳聞之誤。鄭本則據孔子圖考定傳授至魏賈諸君之說也。詳篇目下。

秦穆公伐鄭。晉襄公帥師敗諸崤。還歸作秦誓。

箋云崤。春秋作穀。左傳說。僖公三十年。晉文公秦穆公圍鄭。鄭使燭之武見秦伯。秦伯與之盟而還。使杞子逢孫楊孫戍之。三十二年。杞子自鄭使告。

于秦曰。鄭人使我掌其北門之管。潛師以來。國可得也。穆公訪諸蹇叔。蹇叔曰。不可。公辭焉。召孟明。西乞白乙。使出師。三十三年。晉文公喪未葬。子襄公墨繆經敗秦師于殽。獲孟明。西乞白乙以歸。文嬴請三帥。公舍之歸。穆公素服郊次。嚮師而哭曰。孤違蹇叔以辱二三子。孤之罪也。不替孟明。孤之過也。史遷穆作繆。說為繆公復益厚孟明等。使將兵伐晉。渡河焚船。大敗晉人。取王官及郤。以報殽之役。晉人皆城守不敢出。於是繆公乃自茅津渡河。封殽中尸。為發喪。哭之三日。乃誓於軍中。

秦本紀

釋曰左傳不言作誓。然嚮師而哭。再三引咎自責。悔過深切。與此篇辭氣同。則以誓為敗散時作。與序合。史公則以為王官之役既勝晉而作。蓋今文說如左傳說。則罪已發憤任賢修政轉敗為功。由此如史記說。則痛定思痛懲前毖後圖治不急在此。故夫子有取。而大學篇且詳引其文。若論其本末。則秦擅及鄭盟。又背盟而襲之。貪利拒諫以取大敗。晉背殤用師。以怨報德。從此兵連禍結。故春秋皆罪之。但穆公悔過至誠。求賢若渴。則近於道。使周天子能如此。則中興可圖。而他日不見篡於

秦矣。周東遷以後。齊晉是賴。而晉霸歷百餘年。屏藩王室。迨晉為三家所篡。而秦始得肆。秦自穆公以上。皆志在勤王。終春秋之世。未嘗侵敗王略。至孝公用大凶德之商鞅。始有窺周室之志。而獨夫呂政遂吞二周。忘諸侯。而秦亦不旋踵亡。書文侯之命。秦誓。聖人其有無窮之望。無窮之悲夫。繆者穆之借。峭者穀之俗。江氏說。穀在宏農。鼃池。其語曰。東轍西穀。鼃池所高。見風俗通。山澤篇。尚書百篇。首堯典。終秦誓。唐虞五臣。平地成天。功在萬世。生民。堯授舜。舜禹。稷契子孫。為商周。皆以聖德。

成有道之長。伯益實皋陶之子。其後為秦。秦仲襄
公穆公亦皆賢君。後世用商鞅之法。行酷烈之政。
為虎狼之行。是雖有天下而即亡。且呂政本以不
韋子干嬴氏之統。又用元惡大慝呂斯。焚書坑儒。
殘賊天下。以速族滅。五臣之後盡亡。班孟堅之典
引曰。股肱既周。天乃歸功元首。將授漢劉。謂漢以
堯後撥秦亂。繼周而王。雖漢人尊漢之語。而事實
固然。易首乾坤。終未濟。而雜卦未濟後繫以夬。夬
息則復為乾。明氣運雖有否泰。而乾坤之元萬古
不息也。書首堯典。終秦誓。而撥秦亂者為堯之後。

復舉先王之政。可見天下雖有治亂而堯舜之道
萬古不息也。守先王之道以俟後聖。是在為天地
立心為生民立命之君子。